

**RADIO SCIENCE SERIA
SUSTAINABLE DEVELOPMENT
LIFE MUST GO ON- LIFE JAI THAKI BOLE LAGE
'IN REVERSE GEAR-PICHE JABOLE'
EPISODE-07**

SFX: Give background music.....Loud

laughter.

Father- (Laughing) John, duniya pura tu, hell te jai ase bhabi ase?

John- (laughing) Bhal para koi she dae Josh. Kintu, kaun tu hell? Hell tu, etu Earth nahoi le ba kaun nuba jaga te thaki bo pare. Amar khan laga planet bi ses hobole laga bi ase na nai? **(both laughs)**

Danny- Hobo, hobo, duijon eman he hashi bi. Ami tu dui jon nishina scientist bi nahoi. Ami Social aro Environmental science student thaka nimite, ami bi e- phele kiba tu jane dae! Duniya tu, thik raasta te jai ase bhabi ase na nai?

SFX: Cups & Plates on table

Mother- Ki hoi she? Chouka te bohi kena, eman gorom- gorom kotha koi ase.

SFX: Door bell

Aunt- Kaun ahi ase, ami jani ase. Emmy hobo.

SFX: Footsteps, door opening & closes

Ahi jai she nah.....**(R)**

Mother- Emmy, aji tu apunar laga coaching class bishi deri para chuti hoishe. Duk pai thaki bo.

Emmy- Hoi amma.

Father- Ahi bi Emmy, ahi kena amar laga huru para saathi thaka John ke lok kuri bi. Tar laga khisa bi ami koi thake nah? mon te ase na nai?

Emmy- Mon te ase baba. Hello Uncle. Bhal ase nah?

John- Hoi bhal ase. Apunar kaun tu batch laga coaching class loi ase?

Emmy- Uncle ami coaching class loa nai. Pu-ri ase, aro ami laga major subject tu, Zoology ase.

John- Aha! Science student.

Father- Emmy, apunar uncle Danny Social aro Environmental Sciences teacher nishina, uncle John bi Genetic Engineer phele naam kama manu ase.

John- Aro, apunar baba tu, ka-ra Engineer ase.(laughs) Oh! Emmy, (R)apunar Madam Lilian ke jane na nai? tar, amar maiki ase dae, aro, apunar khan college te, Botany hikai.

Emmy- Jani ase uncle.

John- Apunar amma nishina apunar bi Zoology hika bole ase. Tar ke bi jane nah?!

Emmy- (Laughs & says) Hoi jane uncle. Kintu, kitea ba ki- ki u-lai jai le, botli bi hoi jai.

Danny- Apunar laga homoi ase dae. Ahi bole saal khan te bi bhal homoi ahi bo bi pare. Kintu, etu khan te, noutun bhabana lobole lage, noutun bhabi kena bana aro noutun ideas khan lage. Etea, amar khan Developmental Model te, kisoman beya tu ase. Apunar baba aro uncle John para tu, amar khan planet te, beya- duk thaka sop u-por te, science he raasta khuli di bo koi ase.

Aunt- Etea apunar khan kotha koa upor te, amar khan eman tu najane. John, (R) Danny koa tu thik bi hobo par. Science aro Development naam te chuli thaka tu, eman deri naja bo.

Danny- Bhal para koi she dae sister- in -law. Huni she nah John! (laughing) apunar laga candidate, etea tu, amar khan phele ahi jai she. John, Josh! apunar duijon jane, poila te tu.....agricultural scientists khan, kheti karone Nitrogen, Phosphorous aro potassium khan lage koi she. Kintu, etea tu, anach bhal hobo nimate, dusra saatra (17) anach nutrients lage koi ase. Bio- fertilizers aro juntu khan laga paikhana logot te he mila bole pare.

SFX: Plates & Glass

Mother- Emmy, apunar bhaat ulai di she. Ahi kena khai lobi. Bhai apunar koa tu, ami buji paishe. Hoi le bi kisim hybrid ase dae, aro etu bijon khan para Green Revolution hobo dishe. Toh..... kinika apunar science ke dos laga bo?

Emmy- Uncle Dan, apunar bio- fertilizers aro organic farming kotha koi thaki she. Amar khan desh te, poila para, chuli kena ahi thaki she. Etea tak bi, kheti bari bishi bhak, organic farming kuri ase. Amar khan poila para kuri kena ahea tu, etea he, duniya bhabana kurea suru hoi ase. Etu mane, ekta theng piche kurea nahoi?

Father- Emmy, (R) motion of principle koi nah? (R) etea etu kam kuri ase dae. Lamba jump kuri bole nimite, apunar ekta theng piche rakhi bole lage. Etu karone, organic farming jaruri ase.

Danny- Kintu, Josh! organic farming te, ekta theng piche rakhi bole lage, koa tu, kaun apunar ke koi she? Environmental pollution, hawa-paani moila letra ba sapha nahoa tu, amar khan nijor nimite ase aro, etea laga problem ase. Etu tu hosa ase. Etea mar khan traditional- poila jani kena thakea te wapas jai ase. Scientists khan, laboratories khan te he experiments khan kuri kena ase, tar khan nijor upor nahoi kena.

John- Danny, alak te nalo bi. Amar khan ahi bi, sustainable development upor te, United Nations laga agenda kotha kuri bo. Sustainable Development karone, dhukea ke hata bole jaruri ase koa upor te, apunar bi ki bhabe?

Mother- John, dhukea ke hata bo koile, sop ke kam dile he hobo. Dhuni, jun khan, bishi poisa kamai loi kena ase, namai di bo lage aro duk dhukea te thakea khan ke pungchai di bo lage.

Aunt- Apunar bhal para koi she dae didi. Amar khan sorse poihila, kile dhukea ase etu kotha kobo.

Danny- Apunar bi thik koi she, kile dhukea ase? Amar khan desh te, dhuni aro dhukea majot lamba chet ase. Research ekta te, ki dikhai kena ase koi le, world population mane- duniya te, manu thakea 1% para, duniya laga wealth 50% dhuri loi kena ase koi she.

Father- Hoi le bi Danny, sop ke kam di bo nimite, technology na lage koa tu, amar khan sop bi jane.

John- Thik koi she Josh. Kaun hoi le bi, nijor nimite kam bisari bole lage aro, duniya te, dhukea ke jiti bole karone, noutun technology lage.

Danny- Prithibi te, duk- dhukea ke hata bole, technology na lage dae. Dhukea beya hoi kena he thaka ke, akobi khushi- khushi te cholai loa u-lai jai. Sabi! kheti kam kurea ke loi sabi. Sopse bishi manu ke kam dea tu, etu he ase. Kintu, amar khan laga kheti bari manu khan kinika thaki ase, etu upor te apunar ki kobo? Tar khan duk te thaka tu, technology nimite nahoi.

Emmy- Uncle, etu khan sop upor te, technology karone ase kinika kobo pare?

Danny- Emmy, ami alak phele para loi kena kobo. Tar khan, market para bijon kine, market para, kheti te phela bole dawai kine, market para tel, market para tube wells parts kine. Toh.....kheti nimite phela tu bishi aro u-thi bole he ase, aro yate para, baki bishi hoi jai. Aro, duk pa tu suru hoi jai dae.

John- Hoi le bi amar khan laga sorkar para he, homoi- homoi te, kheti para pa khan upor te daam khan u-thai dea nahoi?

Mother- Bhai John, ami janea hisap te, kheti bari manu khan jitea bishi kati bole parishe, titea daam tu name, aro kitea beya hobo, tar he duk hoi. Kitea hoi le bi, tar he ase dae, noksan hoa tu.

Father- Danny, organic farming te, apunar bi, hobole laga pai kena bi ase na nai?

John- Etu tu, napari bole laga ase dae. Scientists khan dikhea hisap te, juntu laga paikhana lagea tak nai koi she aro, organic farming chuli thaki bo nimite, amar khan desh te, natural fertilizers pai koi she dae!.

Danny- John, apunar golti koi she.paka golti ase. Organic farming te, mati kechu aro paikhana khan tu, milai dea ekta kotha ase dae. Mila-

mili kheti te lagai dea aro, lagai di kena u-lai loa aro bijon khan majot kiman dur hobo lage, etu khan tu alak kotha ase. Yate, lagai dea khan, ekta nahoi le ekta phele para tar khan nijor u-thi jai. Buji bo nimite, nature tu kinika ase, etu jani bo lage. Hawa paani, mati etu khan janea pichot, kinika kuri le bhal hobo etu pai jabo aro sustainable development raasta te jabo pare.

Emmy- Apunar khan jane na nai? Sustainable Development upor te, Unite Nations kam kurea tu.....Amar khan Mother Earth logot, bhal aro, thik para thaki le he pari bole laga ase.

John- Uhhh.....Science nahoi le napari bo.

Danny- Toh.....ahi bi ! science kiman jaruri ase, etu kotha kobo. Ami golti koile, golti koi she koi di bi. Emmy amma aro aunty bi, ami side te ase dae.(laughs)

Aunt- (laughs & says) Ami khan tu, thik kotha te he khara kuri bo, etu upor te naja bo. (laughs) Amar khan Nature kotha koile, a-sol kotha he hobo.

Danny- Ami alak phele para kobo. Amar khan laga gao ki lage ase aro, gao bhal thaki bo nimite, ki- ki lagea khan pabo nimite, sorse poihila, amar khan Nature ke buji pabo lage aro tar pichot, jai ja saal khan te kuri sai kena ahi thaka upor te anach khan laga bo lage.

John- Congratulation Danny! bhal sawal ase. Kintu, apunar ki kobo mon ase, amar khan na buje. Ami bhabea hisap te, apunar kobo mon tu, prakiti para, amar khan bishi hiki bo aro amar khan bhal karone he, tar para kiman di ase, etu kobo mon ase. Science bi etu he bhabe. Ami bi monjur kure.

Danny- Thik koi she. Amar khan laga aim hobo lage aro amar khan kheti kam khan te bi, enika kuri bole lage. Prakiti kinika ase, etu sai kena kam kuri bole lage. Manu khan, mokos chola bole tu ase. Success koa tu etea bi dikhea nai. Etu nimite, kuri thaka nium khan bar- bar botli kuri thake. Ami kobo mon tu, kuri sai kena, golti hoi jai nah? etu cholai ase.

Father- Hoi, eku te bi, etu thik ase, etu nai! Research aro Development he etu pai di bo.

Emmy- Hoi le bi baba, Nature tu, sop phele te thik- thak ase na hoi?

Danny- Emmy, Nature tu, thik- thak ase hoi! tate eku kobole nai. Amar khan kile fail hoi koile, amar khan prakiti upor te eman najane nimate ase. Apunar bi dikhi thaki bo, Green Revolution, success hobo nimate, Chemical Fertilizers aro machines khan jaruri ase koi kena bhabea tu, jani ase na nai? Amar khan life upor te, lagea khan aro gao para dakat dea, etu khan ke janea napungchea nimate, parea tak invest kuri le, progress aro development hobo bhabe ase.

Aunt- Hobo bi pare. Scientific inventions- bana khan tu, amar khan aaram para thaki bole karone banai ase.

Father- Danny, apunar motlop tu, aaram hobole bishi ase koi ase?(R-Hoi) eh! ... etu tu hoile, prakiti aro tar para kinika ako bi banai thaki bo, etu bujea pichot he hobo. Prakiti para dea upor te amar khan ki kuri sai kena dikhi she aro jani she, etu khan bi, amar khan kheti bari kam te chola bole pare.

Danny- Hoi Josh. Etu duita majot buji pabole etea tak bi dikdar ase. Prakiti para deya ki-ki khan, amar manuhar khan parea tak kinika kuri le, u-thai kena chola bole paribo, tate amar khan mon di ase. Etea tu amar khan, janea khan, technology aro ki- ki khan chola suru kuri ase.

Mother- Danny, ekta point te, apunar ami logot hoi! kobo pari bo. Amar khan laga agricultural- kheti aro kha- loa production bishi- bishi hoi dibo bi pare.

Danny- Apunar koa tu bi, sop nahoi le bi aadha tu lobo pare. Amar khan laga production tu u-thea tu u-thi ase. Kheti bari manuhar khan aro kheti khan bishi dikdari lok tu pai ase. Bhukea, nutrition komti aro kam napa , etu khan u-thi ase. Bhabana aro a-ge jabole kam sop te, amar khan giri ase. Economical phele sai le, paani aro hawa moila dikdari bi lok pai ase.

Emmy- Uncle, ek phele amar khan, amar khan laga Mother Earth ke beya kure, aro ek phele, amar khan laga scientists khan, Mars te colonies banai ase. Nijor planet te, nijor kinika thaki ase, etu nabuji kena, etu kurea tu thik nai!

Danny- Umhu.....etu nimate, a-sol aro hosa tu ki ase, etu jani bo lage. Amar khan laga jaga mati te, kiman tak, jinda thaka khan ke sabo pari bo aro, etuetu duita majot kinika phele para mili bole pari bo etu jani bo lage. Etea koi dea upor te, amar khan, Earth te, sustainable lives kinika chuli ase, etu purikha kuri bole lage.

John- Uuu....Danny, apunar ki koi ase, ami eman nabuje. Judi enika ase koile, amar khan laga scientists khan, etu.....amar khan boha nishina planet , saata noutun planets pai she nahoi? tate jai kena nijor colonies banai lobo ahi bi. (laughs)

Danny- John, naha shi bi. Dagor kotha te lobi. (clears throat)Etu he ki dikhai koile, sustainable development kiman bhal - sundoor ase, etu amar khan etea tak bi, najane ke, dikhai ase. Manu- human evolution theory duita kisim te ase. Pihila tu ase, E-sor ase koa bhabana, aro etu nishina khisa khan tu ase.

Father-Etu theory te, amar khan ekta E-sor ase koi kena bisas kure aro tar laga asuret power upor te bisas.

Mother- E-sor tu miracles para bi dagor ase. E-sor thaka upor te, alak chhoto bhabana duita ase. Kisim religion khan, tar khan nijor bisas upor te alak para bi koi.

Aunt- Didi, sop religion khan aro bisas upor te, nijor bhabana thake. Aro kaun tu hoi le bi, tar laga he bhal ase bhabe. Hoi le bi, kaun tu sorse bhal ase, etu dikhi u-la nai.

Danny- Sop religion khan aro bisas kurea khan E-sor logot dakat ase etu mane. Kintu, a-sol te tu, ekjon- ekjon logot jagara, larai kure. Amar khan bhal para jinda thaki bo nimite, akobi jani bole mon thake aro bisare. Kintu, kitea hoile bi, amar khan napari bo aro sop tu, E-sor para koi dea te he mani bo. Bhal- beya, justice- injustice, thik aro misa aro dusra-dusra te, E-sor ke amar khan bodnaam dea. Khata para koi le, amar khan ki tu thik ase, etu jani bo nimite, lamba raasta jabo lage.

Emmy- Hoi le bi uncle, E-sor upor te, manu khan alak- alak bhabana kuri le bi, eku beya nai toh. Tar khan ki te bisas kure, tar khan khushi ase.

Danny- Hoi eku beya tu nai. Bhal manu aro bhal nium hobole tu, komti tu komti ase, amar khan logot. Ki hoi ase, ami khan sop bi jani ase.

John- My dear Danny, apunar tu bishi jani ase, ami a-lop he buji pai. Ki tu hoile bi, apunar koi jai thaki bi (laughing)

Danny- Apunar hashi thaki bi, ami koi thaki bo. E-sor centric philosophy pichot, 2nd theory tu, aji kali laga duniya te, saman - jinis hoi. Yate,

manu khan poisa te bisas aro, duk a-lop he lok pai kena mati te ki-ki pa khan, paree tak loi kena rakhi bole bhabea tu ase.

Father- Hoi etu tu hosa ase. Kam kurea komti aro paree tak laap pabole bhabana thake. Jun khan etu te bisas kure, loi thaki bole khujish kure. Tar khan kitea hoi le bi, manu ke deya aro sacrifice te bisas na kure. Manu- (Laughs)duk napabo aro laap he laap.

Emmy- Apunar hosa koi she baba. Thik etu nishina amar khan kheti bari kam te lok pai ase. Upor mati bhal jai ja khan , kinika kuri le ako bi bhal hobo etu bi nasai ba nakure.

Danny- Emmy, apunar ekdom dorkar point koi she. Manu he manu ke cholai aro, amar khan sop bi prakiti te haat jai. Etu nimite, etea amar khan, duk, bachi bole, pa komti, bisarea aro bisas nakurea life te thaki jai ase. Amar khan laga hawa- paani aro Mother earth ke moila kuri dea, chemicals beya khan bana bole, etea tu machines khan jaruri ase koi kena bhabana thake thaki ase. Billions saal hoi kena bi, amar khan, Maa prakiti ke, jani kena ba najani kena, tar para deya khan beya kuri kena ahi ase.

Mother- Hoi, hoi etu nimite, global warming ula hobo. Ki- ki khan sop bi commercialized hoi ase. Dhun aro dhukea majot kiman alak thaki ase sai sa bi. Amar khan sop bi, etu laga duk lok pai ase, aji kali.

John- Point bhal ekta akobi koi di she bhabi ji. Kintu point ekta apunar pahuri ase.

Mother- Ki laga point?

John- Cha laga point! (all laughs)Hoitoh, Emmy ke bhaat di she.....,

Mother- (laughs)Achha ho achha! ami sop nimite banai di bo.

Danny- Aji tu John tu ki hoi ase, dhamali he dhamali.

John- Ami khushi pa nimite ase dae! amar khan sop eki logot bohi kena, eman dagor, etu bi jaruri kotha koi ase.

Emmy- Uncle John koa tu hosa ase. Jani bole jaruri kotha khan ase. Achha! Uncle Danny, apunar koi thaka tu, manuhar khan bhal nimite, kaun hoi le bi, mani bole dagor message ase. Science para, raasta bishi

di kena ase. Etu nimite he ase dae, Unite Nations khan para sustainable development upor te kotha koa.

Father- Ami, Danny kotha upor te alop kobo. Khujis kurea tu kuri loi she. Manuhar khan bhal thaki bo karone science aro religion duijon bi etea tu, mili kena thaki ase.

Danny- Josh, amar khan jinda hobo karone, etu duita ke eki logot thaki bo di kena, kiba bhal u-la bole ekta bisari bo lage. Hoi! Hoi le bi, poihila amar khan kanjus ba, nijor he lobole mon , manu ke dibole mon na thaka ke phela bole lage.

John- Huh? Etu kinika pari bo!

Danny- John apunar bi alop tu bhabi sabi nah! Etu phele UNO kitea hoi le bi, bhal kadam loi thaki ase. Saal 2030 hoi kena tu, sustainable development phele a-ge ja dikhi pabole targets khan banai kena ase. Amar khan duk- dhukea, bhukea etu ke duniya para hatai di bo aro, tate para, gao bhal, bhal education, sapha paani, sapha para thakea, sapha aro sosta energy aro alak- alak phele jaruri kadam lobole ase.

Emmy- Aro bi bishi ase dae! economic development nishina, noutun bana u-lai dea, bhal infrastructure, dhukea aro dhuni majot namilea ke komti kuri bole, smart cities aro society sop mil - milap te bohi bole, etu khan bi ase dae!

Aunt- Smart aro sustainable cities tu, kaun hoi le bi buji bo. Kintu, sustainable society koa tu ki ase? Societies alak- alak manu majot alak, enika ase naki?

Danny- Hoitoh, golti kuri dea upor te, amar khan golti hoi she koi kena lobole pari le bhal ase. Dhukai dea, corruption aro ki- ki beya khan tu, amar khan laga life logot te he ase, etu bhabi bo le lage.

Father- Danny, enika beya nium amar khan laga society te thakea nimite, no-ha - beya kam khan aro terrorism ke bi amar khan support kurea bishi u-lai ase.

Danny- Apunar hosa kotha koi she. Manu khan no-ha raasta para daam-daam samaan khan u-thai kena dhuni hoi ase. Mother Earth para, khali ekta manu hoi le bi enika u-thai thaki bole mon thaka ke kinika di thaki bole pari bo.

Mother- Haa....sop manu nimate cha! (cups on table) Danny bhai developmental kam sop tu, planet earth ke cho bole kam he ase. Amar khan asani drama kuri ase. Prakiti para deya khan ke bacha bole eku nakure. Cha thanda nahoa a-got khai lo bi.

Danny- Bhabi, apunar mokos bishi bhal ase. Etu karone, kiman botli ahi bo, development phele noutun bhabana lobo lage. Etea United Nations khan bi bhabi ase. Ek phele development dhuri bo aro ek phele conservation rakha tu napari bo.

Emmy- Hoitoh uncle. Conservation - bachai rakhi bole tu, jitea amar khan, samaan pa khan bhal para chola jani le he pari bo.

Danny- Apunar koa tu, manu aro prakiti upor te purikha kurea kisoman khan bi etu he bhabi ase Emmy. Amar khan Earth te, sop gaas- paat aro jaanwar khan bhal para eki logot thaki bole pari ase. Prakiti ke bhal banai. Amar manuhar khan he ase dae, prakiti logot ju-ja ju- ji kurea tu.

Father- Apunar bi thik koi she dae Danny. Etu khan sop tu, amar khan najane nimate ase. Etea laga education system tu, amar khan laga life aaram pabole phele he sai ase. Kintu, United Nations khan etea quality education phele mon di ase.

Danny- Etu mane, janea phele kaun nu bi pu.....ra nahoi. Ek phele amar khan najanea aro aadha he janea ke dos di ase.

John- Saathi enika nahoi dae! Kitap te knowledge- jani bole bishi ase dae. Science bi toh.....etu kitap para he, a-ge jai ase. Indian scientists khan, ekta single rocket para 104 satellite launch kuri she. Etu tu, science aro space knowledge nimate ase dae.

Aunt- John, apunar tu, Danny laga kotha ke halka para loi ase. Tar ki koi ase aro janai di bole mon ase, bishi dorkar ekta ase dae.

Father- Umhuu.....ami laga hisap te, tar United Nations khan laga message janai di bole mon hoi. John, science against te nahoi. A-sol knowledge tu ki ase, etu ke buji pabo lage. Ami thik koi she nah Danny?

Danny- Hoi, apunar thik koi she. Ami jitea environment phele duk pa khan sabole kam suru kurea hoi she, Carbon Dioxide level aro dusra greenhouse gases khan u-tu somoi te, 280ppm thaki sele. 300ppm

pungchi le amar khan bishi duk pabole ase koi thaki she. Tar pichot, 350ppm te u-thai she. Problems khan amar khan laga dorwaja te he ase, hoi le bi developmental kam khan etea tak te bi eman jai ase.

Emmy- Etea Carbon Dioxide level tu, 400ppm ase dae. Etu tu hoi le, aat lakhs saal a-got para bishi.

Aunt- Hoi she...!hoishe!

Father- Apunar, kiman tayari thaki bole pari bo? Homoi- homoi te prakiti tar laga gussa di khai di thake. Kitea ba bhuka, kitea ba baan- paani aro kitea ba amar khan kisim bimar lok pai. Etu khan lok pai le bi, amar khan ki nimite hoi ase nabu je.

Mother- Amar khan laga kheti bari manu khan, kheti khan te, chemical fertilizers aro dusra chemicals khan chola te, beya ani di bole laga thaki ase na nai?

Emmy- Amma, sorse dagor problem- duk u-lai ja tu hoi le, gaas- paat aro jaanwar mori joa khan puchi bole dea, micro- organisms khan beya kuri di she. Etu he mati system laga carbon ke komti hobole dishe. Mati laga PH ke disturbed- choi di kena hilai di she. Nutrients value komti hoi ja nimite, buga chimti aro nematodes- kera infections- sangkramaan bishi hoi jai.

Danny- Emmy, apunar koa tu hosa ase., hoile bi, bhuka he, kaun ke hoile bi kuri bole di jai. Experiment- kuri sai kena, dikhai dea tu hoile, amar khan laga mati te, carbon bishi dibole parea tu, buga chimti khan aro jinda organisms khan modot dea koi she.

John- Kheti bari kam poila para kuri kena ahi thaka, mane- natural nium para, kurea, etu he sorse bhal ase. Kintu, etu nium para , amar khan, manu bishi- bishi hoi joa, etu bi joldi- joldi para u-thi joa ke sabole-sustain kuri bole pari bo?

Danny- (laughs & says) John, (R) kiba ekta hoa, ami yaat kuri ase.(John-Ki ase ko bi nah) Ek din kheti kurea manu ek jon para, tar nishina, kheti bari manu khan aji kali prakiti logot ju-ja kure koi she. (laughs again) Manu khan tar nijor aaram- dhun thaki bo nimite, prakiti para deya khan cholai ase. Amar khan laga planet beya hobo tak te mati te ki pai ase, u-thai ase. Prakiti ke exploit kuri kena, kamai ase aro, jitea beya ekta u-lai

jabo, tate tar hisap ekta te ani bole khujis kure, aro tate bi tar aro kama bo.

John- Danny, etu te ami bi hoi kobo!

Danny- John, khali greedy manu- lalaach khan he, wealth khetai, etu bi duk kam nakuri kena. Manu khan prakiti logot, eki te bohi bole jani ase. Hoi le bi, tar pakala nimate sop pahuri jai. Sop manu bhal hobo nimate, amar khan laga ancestors khan kuri kena ahea, cholai le beya nahoi. Sustainable life te thaki bo karone, amar khan sop etu kadam loi le bhal hobo.

Emmy- Wow!! uncle Danny! apunar tu bishi bhal ase dae! Apunar kotha tu bishi bhal ase. Hoi! amar khan nijor bhal nimate he ase. Prakiti logot, eki logot bohi bo koa tu, amar khan piche jabo koa laga nahoi. Lamba aro sustainable raasta phele kadam loa he hobo. Amar khan sop bhal karone he ase.

-THE END-